

S U M M A R Y

Tej ntsiab lus kev tshawb tau los ntawm tsoom hmoob uas tseem noj nyiaj npawfses

Xeev Minnesota tej ntaub ntawv qhia tias cov neeg Khab, Meskas Dub, Hmoob, thiab Xasmaslis uas tseem nyob rau MFIP (Minnesota's welfare program) yuav nrhiav tsis tau haujlwm ua lossis tawm tsis taus hauv npawfses li lwm pab neeg tom qab ob rau peb xyoos. Xws li, yog saib rau cov neeg txhua tus uas tau txais kev pab los ntawm MFIP nyob rau xyoo 1998 txog lub 5 hlis xyoo 2000, cov feem pua nram qab no yog cov uas tseem tau txais kev pab tom qab xyoo 2000.

- 35 feem pua yog cov Meskas Dawb
- 61 feem pua yog cov neeg Esxias
- 55 feem pua yog cov neeg Khab
- 53 feem pua yog cov neeg Dub (Meskas Dub thiab cov Dub uas tuaj Africa teb tuaj)

Yeej pom meej tias cov feem pua hais los saum no sib txawv deb heev, tabsis tus zauv xwb yuav qhia tsis tau peb tias yog tim dabtsi, lossis txoj kev pab nyiaj npawfses yuav pab li cas kom ho pab tau cov uas muaj teeb meem pab tsis tau lawv tus kheej kom zoo dua qub. Wilder Research Center thiab tau los kawm txog qhov no, uas yog los mus tham nrog 40 pab neeg ntawm cov tseem noj nyiaj npawfses tam sim no thiab cov uas tau noj nyob rau lub caij ntuj nag thiab lub caij ntuj qhua xyoo 2002. Tus uas coj kev sib tham los kuj yog tib haiv neeg ntawm cov uas tuaj sibtham, cov kev sib tham no yog tham txog tej uas lawv paub thiab pom ntawm kev noj nyiaj npawfses thiab kev ua haujlwm.

Cov uas noj nyiaj npawfses tsis hais haiv neeg twg, coob tus yeej pib tau lawv lub neej mus rau txoj kev uas lawv pab tau lawv tus kheej lawm. Txawm li ntawd los, lawv kuj tau hais tias muaj ntau yam teeb meem lawv ntsib uas ua ib qho phab ntsa thaiv kom lawv tsis muaj cuab kav nrhiav thiab tuav tau lawv txoj haujlwm kom lawv ho tawm tau hauv kev noj

nyiaj npawfses. Tsis tag li ntawd xwb tej phab ntsa no kuj yog los ntawm npawfses tej kev cai thiab, lawv kuj tham txog lwm yam xws li kev xaivntsej xaivmuag, tsis muaj tus saib xyuas menyuum, vajtse, thiab kev mus los.

Tib neeg kev to taub txog MFIP

Feem coob ntawm cov uas tau koom rau cov kev sib tham yeej txais yuav npawfses lub tswv yim tias nws zoo li txoj kev pom zoo los ntawm ob tog, tias MFIP pab kom lawv ua tau lub neej muaj txaus noj txaus haus, ces tib lub sijhawm ntawd lawv yuav tsum tau ua li MFIP txoj cai thiab mus ua haujlwm kom lawv pab tau lawv tus kheej. Txawm yog li ntawd los, coob tus kuj pom tias MFIP ua nruj ua heev rau lawv tsis yog pab lawv tiag tiag. Ib txhia kuj xav tias luag txoj cai yeej txhob txwm zais tej kev cai thiab tej kev pab, thiab yeej tsim los mus txo sawvdaws lub zog txog txoj kev nrhiav noj tsis tos lwm tus. Raws li lawv to taub txog MFIP mas txoj kev sib raug zoo nrog tus neeg pab tswv yim txog kev nrhiav haujlwm (job counselor) thiab ua kom tau li MFIP txoj cai mas yog ib qho tseem ceeb heev.

Tej haujlwm MFIP kom ua

Feem coob ntawm cov uas tau koom rau cov kev sib tham yeej paub thiab xav ua haujlwm. Tabsis, coob tus tau ntshai lossis tag kev cia siab los ntawm tej uas lawv ntsib thaum lawv mus nrhiav haujlwm thiab tom chaw haujlwm. Lawv pom tias qhov uas hais kom sawvdaws mus ua haujlwm mas yeej ncaj nces lawm, tabsis lawv kuj xav ntxiv tias MFIP yuav tsum tso kev dav rau cov uas laus lawm, cov muaj mob ua tsis taus, lossis cov uas tu lwm tus neeg uas ua tsis taus noj hauv tsev neeg. Lawv kuj hais tias MFIP tsis muaj kev pab txaus rau cov uas tseem ua taus haujlwm tabsis tseem xav tau kev pab kom npaj txhij. Cov neeg no tsis tau paub txog kev ua haujlwm, lus Meskas, lossis kev

nyeem thiab sau ntawv, lossis lawv ho muaj lwm yam teeb meem xws li hlwb tsis zoo lossis kawm tsis tau ntawv. Tsis tag li ntawd, coob tus kuj tau piav txog tej kev xaivntsej xaivmuag uas muaj tshwm sim tom chaw ua haujlwm vim yog lawv kev ntseeg, lawv hom lus, lawv tsev neeg, lawv kev tseem noj nyiaj npawfses, thiab lawv yog neeg txawv.

Kev pab los ntawm MFIP kom nrhiav tau thiab tuav tau txoj haujlwm

Cov uas tau koom rau cov kev sib tham tau hais txog tej kev pab uas yuav los mus pab kom lawv nrhiav tau thiab tuav tau lawv txoj haujlwm. Nws muaj xws li kev pab txog kev caij tshab mus los thiab kev zov menyuam, tej nqi kawm, thiab pab nrhiav haujlwm lossis pab kom yus tuav tau txoj haujlwm. Thaum lawv tau txais tej kev pab li no lawv pom tias yeej pab tau. Tabsis, coob tus hais tias lawv xav tau tej kev pab li no kom ntau dua li qhov uas MFIP tau pab los lawm.

Pajtshab rau kev ua haujlwm

Cov uas tau koom rau cov kev sib tham lawv sawvdaws muaj lus ua tsaug tias MFIP tau pab lawv muaj noj muaj haus thaum lawv muaj kev tu ncu. Lawv pom tau tias MFIP lub niam tswv yim yog los mus ua kom neeg paub tias kev ua haujlwm zoo dua li noj npawfses. Yuav luag txhua tus yeej nyiam ua haujlwm, tshwj xeeb kom dim ntawm tej kev ntxhiv siab MFIP pheej hais kom ua, nrog rau kev pom lawv tus kheej tseem ceeb thiab muaj nqis.

Tab sis, coob tus kuj tau hais tias MFIP txiav tej kev pab sai dhau thaum sawvdaws pib ua haujlwm. Lawv hais tias yus tej nyiaj hli ces tsuas yog los mus duav tej kev pab uas MFIP txiav lawm xwb, tshwj xeeb yog muab tej kev siv ntawm txoj haujlwm (xws li nqi caij tshab mus los thiab nqi kho mob) los mus piv rau lwm yam kev pab uas tsis yog nyiaj ntsuab MFIP txiav lawm, uas yog nqi zov menyuam thiab nqivaj nqitsev.

Yuav ua li cas thiaj yuav pab sawvdaws kom ua tau haujlwm?

Kev npaj txhij rau kev ua haujlwm

Qhov kev sojntsuam no pom tias yog tus neeg pab tswv yim txhob tuav coob coob tus neeg mas yuav ua rau qhov no txawv loj heev, cov neeg pab tswv yim yuav paub sai tias leej twg yog tus uas yuav tsum tau

txais kev pab ntau dua, thiab pib pab lawv. Nws yuav ua kom muaj kev sib paub zoo thiab kev ntseeg siab mas cov niamtxiv sawvdaws thiaj yuav txaus siab qhia lawv tej teebmeem uas tsim nyog yuav tau xav txog ces pib daws lawv tej teebmeem kom thiaj tsis tau nrhiav haujlwm ntev ntev yam tsis tsim nyog. Tsis tag li ntawd xwb, yuav tsum muaj tej ntaub ntawv txhais ua lawv hom lus thiab muaj neeg txhais lus kom ntau rau cov neeg thoj nam los mus pab kom lawv to taub txog tej kev cai thiab tej kev pab uas MFIP muaj. Cov neeg Meskas los yeej tseem xav tau kev pab nyeem ntawv thiab txhais kom lawv ho to taub tej kev cai thiab tej ntaub ntawv uas lawv yuav tau ua.

Kev npaj txhij tom chaw ua haujlwm rau cov neeg noj npawfses

Cov noj npawfses yuav tau haujlwm ua yog lawv tug neeg pab tswv yim koom tes nrog tej chaw ua haujlwm los mus sib tham txog kev xaivntsej xaivmuag thiab kev tsis sib to taub tom chaw ua haujlwm. Tej zaum cov chaw ua haujlwm yuav tsis muaj haujlwm rau cov noj npawfses uas ho muaj teebmeem ua tsis tau haujlwm. Cov uas zoo li no, thia thib (instead) li pheej nrhiav haujlwm tabsis ho nrhiav tsis tau haujlwm ua, nom tswv muaj cuab kav: tshem coob tus mentsis tawm ntawm qhov uas pheej kom nrhiav haujlwm ua; los mus kho txoj cai es cia kom sawvdaws muaj kev kawm ntau ntxiv thiab lwm yam uas yuav los mus pab kom ho ua tau haujlwm; lossis tsim kom muaj haujlwm ntau ntxiv.

Tej kev pab uas yuav pab kom sawvdaws ua tau haujlwm

Txoj kev pab npawfses yuav pab tau cov noj npawfses kom zoo dua qub yog lawv los mus tshawb xyuas seb yam twg yog yam uas sawvdaws yuav tsum muaj thiab tej kev pab ho tu ncu rau kis twg. Tej ntaub ntawv qhia txog tej kev pab uas muaj rau sawvdaws los yuav tau muab qhia rau sawvdaws kom zoo dua qub, tsis yog los mus daws qhov teebmeem uas hais tias zais tej kev pab tsis qhia rau pejxeem xwb, tabsis los mus pab kom cov noj npawfses to taub tias pob nyiaj npawfses tsuas muaj npaum cas, thiab kev siv pob nyiaj no yog yuav siv li cas.

Qhov kev pab ntawm tus pab tswv yim yuav muaj qab hau ntxiv los ntawm qhov txo cov neeg lawv saib xyuas kom tsawg thiab npaj kom txhij rau lawv tes haujlwm. Kev tshawb kawm pom tau tias cov neeg ua

haujlwm pab tswv yim no yuav tau kawm ntau yam xws li kawm txog kev to taub lwm haiv neeg kev lis kev cai, kev tham lus nrog cov tsis paub lus Meskas zoo, thiab kev ua haujlwm nrog cov neeg siab ceev thiab ntseeg tsis tau lwm tus.

Yam zoo ntawm kev ua haujlwm

Qhov kev tshawb kawm no qhia tias qhov uas ua haujlwm thiab tseem noj nyiaj npawfses tsis yog qhov uas zoo li sawvdaws xav. Kev ua haujlwm koj ntau yam nuj nqis tshiab los rau tsev neeg, thiab MFIP yeej tsis tau tham txog tej nuj nqis no li. Nws yog ib qho tseem ceeb uas yuav los mus ntsuam xyuas tias ua haujlwm no ho tau nyiaj li cas tiag tiag, nrog tej nqivaj nqitsev, kev caij tsheb mus los, kev zov menyuum, thiab nqi kho mob.

Kev dhau mus rau qhov uas yus khwv txaus noj txaus haus li siab xav los ntawm tes haujlwm them nyiaj tsawg

Coob tus ntawm cov tau tuaj koom kev sib tham, pom tias cov haujlwm uas tsis siv kev txawj ntse yuav koj mus tsis txog rau qhov uas yus khwv txaus noj txaus haus li siab xav. Tsib lub xyoos xwb yuav tsis txaus rau ib tug neeg ua haujlwm tshiab uas tsis muaj kev txawj ntse kom dhau mus pab tau nws tus kheej yog tsis muaj kev kawm ntxiv. Qhov kev tshawb kawm no qhia tias cov neeg zoo li no yuav tsis muaj feem nce mus tau tes dej num zoo. Pom tau hais tias nws yuav pab tau sawvdaws los ntawm ib txoj cai txais neeg tshiab ua haujlwm uas muaj kev kawm ntxiv, tom qab ua ib ntus ntawm tes haujlwm uas tsis siv kev txawj ntse lossis them nyiaj tsawg.

Tej sawvdaws pom thiab paub txog npawfses lub homphiaj

Lub homphiaj thib ib ntawm tus neeg pab tswv yim yog los mus pab cov neeg noj npawfses kom vam meej mus rau kev ua haujlwm, lub homphiaj thib ob yog los mus siv npawfses txoj cai rau sawvdaws. Txog rau qhov uas tus neeg pab tswv yim ua kom haum li txoj cai heev dua li pab txhawb kom sawvdaws mus ua tau haujlwm, coob tus ntseeg hais tias txoj cai txo sawvdaws lub zog txog txoj kev uas yuav khwv kom txaus noj txaus haus li siab xav, tshwj xeeb yog thaum uas sawvdaws tsis paub meej txog tej kev cai thiab tej kev pab uas MFIP muaj.

Yuav kom npawfses tej kev cai thiab tej kev pab pab tau sawvdaws, nws yog ib qho tseem ceeb uas yuav tau hloov tej tau hais los no. Lo lus teb cia yog kom muaj cov neeg ua haujlwm uas tsis yog Meskas kom coob, muaj kev kawm kom zoo rau cov neeg ua haujlwm, ib tug neeg ua haujlwm saib xyuas neeg kom tsawg leej mentsis, thiab tes dejnum ntawm tus pab tswv yim thiab tus neeg noj npawfses yuav tsum tau ua kom haum rau ob tog.

Xaus lus

Tej uas tshawb tau los ntawm qhov kev sojntsuam no qhia tias qhov uas yuav pab tau cov neeg Khab, Meskas Dub, Hmoob, thiab Sasmaslis zoo tshaj mas yog yuav tsum tau pab txhawb ib leeg zuj zus kom ntau dua qub. Qhov no pib los ntawm kev npaj cov neeg pab tswv yim uas saib xyuas coob coob tus muab txo kom tsawg txog qhov uas lawv muaj cuab kav to taub tus neeg noj npawfses tej teebmeem tias yuav nrhiav hom kev pab dabtsi thiaj yuav pab kom lawv mus ua tau haujlwm. Nws kuj txhais tau hais tias tus neeg pab tswv yim yuav tsum muaj txoj hau kev los mus nrhiav tej kev pab kom haum raws li sawvdaws kev chemtsum.

Peb kawm tau dabtsi los ntawm cov kev sib tham nrog cov neeg Hmoob

Dhau li ntawm tej ntsiab lus dav dav uas plaub hom neeg peb tau nrog tham tau hais lawm, peb kuj hnov tej yam li nram qab no ntxiv los ntawm 57 tus hmoob uas tau tuaj koom rau 8 qhov kev sib tham uas muaj nyob rau Minneapolis, Saint Paul, thiab Winona:

Cov hmoob kuj pom zoo nrog tej uas npawfses xav kom sawvdaws ua xws lis yuav tsum tau ua haujlwm:

- Lawv yeej ras txog qhov tseem ceeb ntawm kev ua haujlwm kom muaj noj muaj haus, muaj nqis, thiab muaj meej mom.
- Lawv hais thiab hais dua rau Meskas tias Hmoob tsis yog neeg “tubnkeeg” thiab “yeej tsis yog neeg thov khawv.”
- Txawm li ntawd los, coob tus muaj mob muaj nkeeg thiab ua tsis taus noj, lossis ho saib xyuas qee leej ntawm tsev neeg uas muaj mob lossis ua tsis taus noj, ua rau lawv mus ua tsis tau haujlwm.

MFIP tsuas pab kom txhob tuag xwb, tsis yog yuav pab kom vam meej:

- Coob tus pom tias lawv yuav tsum paub lus Meskas thiab kawm ntawv kom ntau ntxiv thiaj li yuav tau txoj haujlwm them nyiaj zoo.
- Cov niamtxiv uas muaj menyuam coob yuav khwv tsis txaus los yug tsev neeg yog tau cov haujlwm them nyiaj tsawg, tshwjxeeb yog xam tej nqi zov menyuam thiab tej nqi kho mob.

MFIP tau hais rau ib txhia tias kom lawv txhob kawm ntawv lossis kawm lus Meskas lawm, tiamsis cov chaw ua haujlwm ho hais tias peb tsis yuav koj es koj mus nrhiav kev kawm tso:

- Coob tus hais tias lawv muaj kev nyuaj siab, ntshai, thiab tsis pom qab mus nrhiav kev pab qhov twg.
- Coob tus txhawj tias lawv laus lawm ntshe yuav kawm tsis tau ntawv.

Coob tus qhia txog tej kev xaivntsej xaivmuag uas lawv tau ntsib:

- Luag tsis txais lawv tab txawm tias lawv yeej muaj lub peev xwm ua tau txoj haujlwm, vim lawv tsis paub lus Meskas zoo uas yuav qhia tias lawv yeej ua tau txoj haujlwm.
- Qhov uas lawv tsis paub lus Meskas ua rau lawv nyuaj uas yuav tiv thaiv tau lawv txoj cai.

Kev tsis paub lus ua rau cov Hmoob noj npawfses nyeem tsis tau MFIP tej ntaub ntawv xa tuaj, mas ua rau:

- Lawv tsis paub txog tej kev sib ntsib.
- Lawv to taub yuam kev txog tej kev cai thiab tej yam lawv yuav tsum tau ua.
- Tej zaum lawv kuj tsis paub txog tej kev pab uas lawv yuav thov tau.

Cov Hmoob noj npawfses kuj txhawjxees txog kev coj menyuam rau lwm tus zov:

- Cov tsev neeg coob thiab tsis paub lus Meskas mas nyuaj rau lawv uas yuav nrhiav tau qhov chaw zov menyuam kom haum lawv.
- Niamtxiv xav qhia lawv tej kev lis kev cai rau lawv cov menyuam.

Cov Hmoob noj npawfses muaj kev txhawj loj txog kev thauj xa mus ua haujlwm:

- Cov tsis paub lus Meskas mas nyuaj rau lawv yuav caij tsheb npav.
- Coob tus hais tias nws yog ib qhov uas tseem ceeb heev rau lawv uas yuav tsum muaj ib lub tsheb uas tseem siv tau.

Lub Koom haum pab tibneeg nyob tebchaws Meskas yog tus them nyiaj rau qhov kev tshawb kawm no. Tej uas tshawb nrhiav tau nod yog los ntawm Wilder Research Center, tsis yog tseem fww tej kev xam pom lossis txoj cai.

WILDER RESEARCH CENTER

1295 Bandana Boulevard North, Suite 210
Saint Paul, Minnesota 55108

651-647-4600; FAX 651-647-4623
www.wilder.org/research



Yog xav paub ntau ntxiv txog tej ntsiab lus uas nrhiav tau ntawm qhov kev tshawb kawm no, lossis xav kom luam ib daim *Tej ntsiab lus ntawm kev tshawb tau* pub rau koj thov hu rau Wilder Research Center. Yog ho xav tau ntau daim los kuj muaj nyob rau hauv Internet www.wilder.org/research lossis hu rau 651-647-4600
Tus sau: Ellen Shelton
4 hlis 2003